


**I**st nützlich zu wissen / so drey puncte vngleich gestellt werden / das man sie behend so man seyn bedarff / in eyn zirkel verassen müg diß mach also / Die drey puncten seyen .a. .b. .c. die zeuch mit zweyē geraden liniē zusamē .a. .b. vnd .b. .c. darnach thu im züglicher weis wie vorn in der .21. figur angezeigt ist / sūch die mittel beider liniē .a. .b. vnd .b. .c. vnd laß die zwü gerade liniē so die zwü für gegebenē liniē .a. .b. vñ .b. .c. ytliche in der mitt von eynander teylen vnder sich herab durch eynander streichen / vnd so es not thut / so erlenger die bed gerad teilliniē / Darnach nym ein zirkel vñnd setz den mit dem ein fuß in den puncten .d. vñnd den andern in den puncten .a. vnd reiß darauß ein ganken zirkel ryß / so rürt der zirkel / die drey puncten .a. .b. .c. wie ich das vñden hab auffgrieffe.



**A**ch soll man wissen zu finden / so ein weyter zirkel ryß an ein gerade lini rürt / das man dan enge halben der winkel so die liniē so nahe zusam lauffen / nit wol sehen kan / wo sie rüren / das kan man durch disen nachfolgetten weg zu wegen bringen / Setz ein zirkeltrum .a. .b. vñ eyn gerade lini die sie an rürt .c. .d. Nun nym ein zirkel setz in mit dem ein fuß in das end .c. vñ mit dem andern fuß reiß ein wenig hynem gegen dem end / d. ein runden ryß vnder sich vnd ober sich / wo dan diser ryß die lini .c. .d. durchschneyt / da setz ein .e. Darnach nym den zirkel vñuerrückt / vñnd setz in mit dem ein fuß in den puncten .e. vnd reiß mit dem andern fuß rund durch das end .c. wo sich dann dise zween rund ryß oben schliessen da setz ein .f. aber vñden ein .g. Darnach reiß auß den zweyen punctē .f. .g. ein gerade lini / wo dise lini die zwerch .c. .d. durchschneyt da setz ein .h. wo sie aber durchschneyt das zirkeltrum .a. .b. da setz ein .i. Darnach zeuch auß dem puncten .i. ein zwerch barlini. gegen der obern zwerch lini .c. .d. wo dann dise lini das zirkeltrum durchschneyt / gegen dem end .b. da setz eyn .k. Darnach nym die leng .i. .k. vnd leg sie auff die lini .c. .d. mit dem eyn end in den punctē .h. vñ jr leng schneyd gegen dem .d. mit einem puncten .l. ab / Darnach zeuch .l. .k. gerad zusamen so wirdt darauß eyn ablang strung .h. .l. .k. .i. nun so du das mittel wilt finden / in welchem puncten die krum lini .a. .b. die gestrackt .c. .d. anrürt / so nym ein zirkel / setz in mit dem ein fuß in den puncten .l. mit dem andern reiß durch den puncten .h. rund ober sich vnd vnder sich / Darnach verker den zirkel / vnd setz in mit dem ein fuß in den puncten .h. vnd reiß mit dem andern fuß rund durch den puncten .l. ober sich vñnd vnder sich / wie das in der .21. angezeygt ist / wo dann dise zween runden ryß sich oben schliessen / da setz ein .m. aber vñden eyn .n. Darnach reiß eyn gerade lini .m. .n. wo dann dise lini / die zwerch .c. .d. durchschneyt da setz eyn puncten .o. der ist das ort / da die krum lini .a. .b. die gerad lini .c. .d. anrürt / wie du das hie vñden auffgeriessen sihest.